

't

**limburgs  
vastelaovesleedjes  
konkoer**



**REMUNJ  
ORANJERIE  
25-11-1983**

## HOBS DOE DAT AUCH ?

Refrein:

Hôbs doe dat auch?  
Dat raar geveul van bènne  
Hôbs doe dat auch?  
Dae sjoever langs de rögk  
Hôbs doe dat auch?  
't Is weer effe wènne  
Mer 't kump jeeder jaor weer trök  
Hôbs doe dat auch?  
Ich laot mich toch neet kènne  
Ich haol die drij daag Vastelaovend op mien zögk:

Vers 1:

Zoa door 't jaor van tied tot tied  
Hôb ich tweè lènkse henj  
Es ich dan urges aan begin  
't Geijt mis aan alle kenj  
Mer es 't Vastelaovend is  
Dan geijt 't wie gesjmeerd  
Dan knetter ich van energie  
En geijt d'r niks verkeerd

Vers 2:

Is door 't jaor 'ns get te doon  
Dan sjtaon ich veur de kas  
Wat doon ich mich toch noe weer aan?  
Van alles wurd gepas  
Mer es 't Vastelaovend is  
Dan is dat zoa gefiks  
Dan barsj ich van de fantazie  
En maak ich get oet niks

Tekst : Miets Zijlstra-de Loo, Geleen

Muziek : Ben Erkens, Geleen.

Zang : Ben Erkens

## H I L L I G E

### Refrein:

Ich gleuf mit de Vastelaovend  
dat ich n' Hillige bin  
Dat kunt va al die ingelkes  
alleneuj um mich hin.  
Ich bin in der ziëvende hiëmel  
doa bin ich toch zoë geer  
Doa wil ich nog get bliëve  
mit dich in hoëgere sfeer

### Vers 1:

Wat woar de Vasteloavend  
oane os maëdjes derbei  
Toevallig zint de schönste  
alleneuj noe hei  
Vier es onschuldige Hillige  
bei al die schoën ingele  
Dat is os alles weëd  
dat is der hiëmel op eëd:

### Vers 2:

Wie ze zich och verkleije  
dat is os toch gans egaal  
Ze bliëve toch de schönste  
van der ganse zaal.  
Ze zint zoë leef attent charmant  
en wat ze angesch och nog hant.  
Zoë braaf en nog veul mië  
dat motte ingele zië !

Tekst : G.J. Prickaerts, Heerlen  
Muziek : W.F. Eltink, Heerlen  
Zang : Joh. Janssen en  
4 Klumpkes Blumkes

## ZOU ICH DICH ÈNS PAKKE

---

---

### Refrein:

Hij,  
Zou ich dich èns pakke,  
vunjs 't good ès ich dich pwén,  
maog ich dich ein muulke gaeve,  
neij dat zin gein gekke twén,  
zou ich dich èns pakke,  
èns duuje estebleef,  
Kôm noe bès toch neet zwao bluè  
want ich vènj dich toch zwao leef } 2 x

### Vers 1:

Mit de Vastelaovend haw Jupke hièl get doos,  
dronk zich mènning pilske zwaoveul es hé mèr koos,  
zênge en klasjenere, wat hâw dè kael plèzeer  
mè mit dat hé Merieke zaog, versjaalde hém 't beer.  
en hé zông, en hé zông, en hé zông

### Vers 2:

Mrie 'n ech sjwaen bleumke, die zaog waal gèt in Jôp  
leet zich van 'm pwénne, al haw ze waal gèt flôp  
waor nog gèt verlege, haw zwao gèt nwaots gekaord  
mè waor lang zwao besjaemd neet miè,  
s'aoes achter die paort.  
wie ze zông, wie ze zông, wie ze zông

### Vers 3:

Zin noe al gèt ouwer, oos Jupke en Mèrie  
weurt 't Vastelaovend, dan rammelt hun de prie,  
lièrde zich toen kènne, dat wèt gèr ôngerhendj  
en auch nog nao zwaoveul jaor,  
sleit Mrieke nog in brèndj.  
wènt 'r zungt, wènt 'r zungt, wènt 'r zungt.

Tekst en Muziek:

Th. v. Mulken, Stein

Zang: Gutus Clemens

## WAAT MÓT ICH DRAGE

### Refrein:

Waat mót ich drage op u boore bal,  
Op u boore bal unne blauwe oeveral.  
Waat mót ich drage met de carneval,  
Met de carneval unne blauwe oeveral.  
Dao in kuntje met di-j daag vól wurwerreke,  
En dan zal auch neemes niks aan uch merreke.  
Waat mót ich drage op u boore bal,  
Unne blauwe oeveral.

### Vers 1:

Dae met di-j daag gemaek'luk zitj,  
det es daen oeveral.  
Dao in veultj eederein zich fit,  
auch met de carneval.  
Met waat-je in eur tesse vingtj,  
heb-tjae nog dek plezeer.  
En as u maegdje aan uch hingtj,  
dan roek'ut al nae beer.

### Vers 2:

Ze haai-je vreuger klompen aan,  
di-j zeeje noow neet mieer.  
Dao zeen dur noow di-j doon wat aan,  
en meine ich bin hier.  
Ich draag dae blauwe oeveral,  
al bin ich mer'ne boor.  
Dan loup ich met de carneval,  
nog doeer en steinse moor.

### Tekst en Muziek:

Pierre Dentener en Eddy Hekers, Weert

Zang: Pierre Dentener  
Eddy Hekers

## LAUT ÒS MER SJUUVE

Refrein:       Laot òs mer sjuuve  
                  mit die sjuuftrompet  
                  det guf jao vanzelf vää'l geretteketed  
                  Laot òs mer sjuuve  
                  mit dae saxofoon  
                  veur sjele 't sjpel van de clown  
                  Det kan òs nieks bõmme  
                  want wo veur auch kòmme  
                  is Vastelaovend sjoon.  
                  Det kan òs nieks bomme  
                  want wo veur auch komme  
                  is Vastelaovend sjoon

Vers 1:         Es veur weer mit ein joekskepel  
                  door òs sjoon Limburg gaon  
                  dan sjele veur 't sjoonste sjpel  
                  det altied blief besjtaon  
                  Dan löp òs idderein weer nao  
                  es clowns mit sjuuftrompet  
                  Want Vastelaovend is weer dao  
                  mit vää'l geret'ketet

Vers 2:         Dae joeks dae zit òs in 't blood  
                  mit maskes en muziek  
                  Veur veule òs van kop toet voet  
                  in Limburg toch zo riek  
                  De ganse troep duutj idders keer  
                  mer op die saxofoon  
                  want wo veur kòmme mit plezeer  
                  is Vastelaovend sjoon:

Vers 3:         Veur toete en veur blaoze òs  
                  de lònge oet 't lief  
                  zodes ze d'r van sjpringe mds  
                  zolang 't doere blief  
                  Dao wo dae sjone kwatsj besjteit  
                  mit sjpas en geaajhoor  
                  Zingk idderein van gekkigheid  
                  biej òs aan ein sjtuk door:

Tekst en Muziek: J. Heldens, Asenray-Roermond

Zang: Jan Heldens en het Asenray's jongerenkoor  
ASJOKO

## L I M B U R G   B L E U J T

### Refrein:

Zingenteere springendteere mèt meziek  
Bij de ierste toene veule veer us riek  
Joonk en aajd kom noondepie  
Same in gooj harmonie  
Eus hertsje greujt  
Eus Limburg bleujt  
Jao wat wille veer nog mie

### Couplet :

Vraag me us ins wie ut geit  
Neet te klaoge 't-is e feit  
Heij bij us geit alles good  
Goon trop oet mèt volle mood  
Limburg is vol klaank en kleur  
Vastelaovend veur de deur  
Eederein is weer present  
Lach en zeet content

Tekst: A.J. van Loo, Maastricht

Muziek: Loek Lemmens, Munstergeleen

Zang: Tinie Lemmens



WIE AWWER WIE GEKKER

Refrein:

Wie awwer wie gekker  
Zoa zaet me dat dèkker  
Op zóndig knatsj  
Op maondig raad  
Op dinsdig sjtapelgek  
Wie awwer wie gekker  
Zoa zaet me dat dèkker  
Wie awwer wie gekker  
Zoa is 't mer krek

Vers 1: 't wurt weer Vastelaovend,  
auch ich num dao aan deil  
van sjmörgens pès aan d'n aovend  
hõb ich weer finte veil  
lèts keek ich op de klender,  
mer nae, wat zaog ich dao  
dat ich mit karneval jaorig bin,  
weer get awwer waer, ja jao  
me dat beteikent auch, es ich dat zègke moug .....

Vers 2: jao, ich bèn neet de ènnige,  
dae dat gelök dan tref  
want g'luif mich, 't zeen d'r mènnege,  
wat ich heël good besef  
want bèste auch neet jaorig,  
dan geld toch aeve good  
wat ich euch noew nog èns zègke gaon,  
veur't geval geer 't vergoot  
geer wit waal wat ich mein,  
't klink wie dit refrein.....

Tekst : W. Debets, Geleen

Muziek : P.C.H. de Waard, Geleen

Zang: Wim Debets



VASTELAOVUNDJ POLLEKA

**Refrein:** Zegk laotj os nog us danse oppe straot,  
Dootj met os mèj det kan gein kwaod.  
Staatj toch neet te haoje zoeë allein,  
Veuldje neet dae kriebel in eur bein?  
Zegk laotj os nog us danse oppe straot,  
Dootj met os mèj det kan gein kwaod.  
Paktj d'n eine of d'n angre in d'n erm:  
Hieel docht beej-ein det es lekker werm.

**Vers 1:** t'Es met di-j daag toch niks gedaon  
as-je zoeë stieef aanne kant blijftj staon.  
Hè-jae 't van toees neet mèj gekriegee  
of es 't uch te hoeeg soms in de bol gestieege?.....

**Vers 2:** Pap en oes Mam staon hand in hand,  
vanne kaotj te stampe aanne kant.  
Kieeke nao 't loupe van di-j gekke  
mèr dae lange stoet dae wiltj neet wieeter trekke....

**Tekst:** Tekstgroep Weerter Operettekoor

**Muziek:** J.M.A. Kollee, Weert

**Zang:** Ein deil van 't Weerter  
Operettekoor

## DAO MOSTE MÈT LJÈRE LÉVE

Refrein: Dao moste mèt ljèrre léve weurd altied gezag.  
Dao moste mèt ljèrre léve, léve daag en nach.  
Dao moste mèt léve, dao moste mèt goon,  
de Vastelaovend blief altied bestoon.  
Dao moste mèt léve, dao moste mèt goon,  
want de Vastelaovend blief altied bestoon.

Vers 1: Ich hōb un aardig vruiwke  
Get oet un lóterie  
Ze trèk noe aan 't tuiwke  
Die daag 't zeen thèrs drie  
Ich houd hem neet mjè tege  
Dus laot ich hēm mhèr goon  
Ich vraog het noe al jaore  
Wat moste dao mèt doon?

Vers 2: Ich ging mèt Vastelaovend  
Ins nao de dokter toe  
't Waor eine verkleijde  
En ich dach och wat noe  
Heer houw dezelfde klachte  
In errem kop en bein  
Veur waore nog bie machte  
En zonge dit refrein:

Vers 3: Zingk noe en amuzeer uch  
Hèt is weer karnaval  
Laot goon de boonte störum  
In Limburg euveral  
Heer is neet weg te deenke  
Ich gaef uch gooije raad  
Kom op nog eine draenke  
En deenk aan deze praot

Tekst en Muziek: L.L. Volders, Meerssen

Zang: Leon Volders

IEG HOD VAN ET LEEVE

**Refrein:** Ieg hod van et leeve, ieg hod van de luu  
al wis ieg och duks nit woarum.  
Ieg hod van et leeve op daach zoeë wie huu  
en zeng ieg e litje doarum.

**Vers 1:** Alle luu zunt miensjlieg en alle luu zunt vrung  
woarum zurgt jenne dat me alle daach zung?  
Ieg veul mieg tsevree en ieg los mieg joa,  
dat kan ieg mietstal van mieg nit versjtoa.

**Vers 2:** Jenne kan zare woarum ieg hij bin  
mar ieg han nuus tse klare, den ieg han jouw zin,  
Ieg veul mieg jeluklieg al zaan ieg et zelf  
Ieg bin huu zoeë loestieg en jek wie de elf.

Tekst en Muziek: Paul Weelen, Kerkrade

Zang: Paul Weelen  
+ Koempels

## GÈÈF HIEJ EIN RÖNDSJE LEVE KASTELEIN

Refrein: Gèèf hiej ein röndsje leve kastelein  
de bend is los hiej is get oet ver gaon wiej eine trein  
Gèèf nog ein röndsje, hie weurd zich eint gepietsj  
dan is 't of ein èngelke ein klein ondeugend èngelke  
dan is 't of ein èngelke euver m'n róngake glietsj

Vers 1: In Limburg kal ver koeterwaals,  
ich han, ich hei, ich hõb  
Oos taal weurd gans dooreingemiesj,  
't geit, 't geet, 't löp  
Mèr aan de teek of aan 't buffet,  
is dat toch ugaal  
want dao sjprèek ver sjtök veur sjtök  
prusies dezelfde taal

Vers 2: Oos eige Limburg is dee's daag,  
zo schön, zoe sjoen, zao sjaon  
De parel van 't ganse land,  
sjpant hiej de kroen, de kraon  
Al sjprèke veer zao wie de mam  
oes dat hèèt veurgezag  
Mèt Vastelaovend zènd ver EIN  
zao zènd ver graotgebrach

Tekst en Muziek: Marlies Notten-Keulaerts en  
Joke Schlein-v. Velzen, Geleen

Zang: Marlies Notten-Keulaerts en  
Joke Schlein-v. Velzen

stichting l.v.k.  
same met



S. L. V.

en



**B.C.L.**

Opgericht 18 Januari 1885